

Inatsisartut aalajangiiffigisassaattut siunnersuut Naalackersuisut peqquneqassasut Nukissiorfinnut nalunaaruteqaqqullugit, akinut suliffeqarfiup allattorsimaffiani allaqqasut allanngortinneqassasut, siunissami ima allassimalerluni innaallagissamut atuisut nunami aalisakkanik suliffissuarnut innaallagissamut akikillisaaffigisaraat aammalu imermik atuisut nunami aalisakkanik suliffissuarnut imermik akikillisaaffigisarai, maannakkutut ikkunnaarluni Nuummiunerusut ataatsimoorullugu kiassarnermik atuisunit akilerneqartarunnaarsillugit.

(Inatsisartunut ilaasortat, Siverth K. Heilmann aamma Steen Lyngé, Atassut)

Akissuteqaat

(Pinnngortitamut, Avatangiisinut Inatsisinillu Atuutsitsinermit Naalackersuisoq)

Siullermeerneqarnera

Naalackersuisut sinnerlugit Sivert K. Heilmann aamma Steen Lyngé aalajangiiffigisassatut siunnersuuteqarnerannut qutsavigaakka.

Innaallagissamut, imermut kiassarnermullu akit nunarput tamakkerlugu, illoqarfinni nunaqarfinnilu, inuuniarnermi atugassarititaasunut sunniisarput. Taamaattumik akit ilusaata kissaatigisatsitut iluseqarnissaata akuttunngitsumik oqallisigisarnissaa isummerfigisarnissaalu pingaaruteqarpoq, tassanilu ilaapput akit ilusaannut politikikkut anguniakkat. Tamanna eqqarsaatigalugu Hr. Siverth K. Heilmann-ip aamma Hr. Steen Lyngé Nukissiorfiit akigititaasa ilusilerneqarnerisa misissorneqarnissaat pisariaqartinneqartoq sammitinniarmassuk Naalackersuisut tamanna qujaruppaat.

Aammalu kiassarnermi sullitat ullumikkut innaallagiaqarnermut imeqarnermullu akit ilusaannut annertuumik aningaasalersueqataasut siunnersuuteqartut uparuarmassuk, tamanna ilumoorpoq. Siumut, Demokraatit aamma Atassutip akornanni naalackersuisooqatigiinnissamut isumaqatigiisummi allassimasutut, ilaqutariit tamarmik assigiinnerusumik atugaqalersinniarlugit innaallagiamut, imermut kiassarnermullu akigititani nammaqatigiinnissamik naapertuulluartsinissamillu Naalackersuisut anguniagaqarput. Tamatuma saniatigut nunatsinni sumiluunniit najugaqartuuneq apeqquaatinnagu inuussutissarsiornermik siuarsaannermi assigiimmik periarfissaqarnissaq qulakkeerniarlugu, nunatsinni tunisassiorfinni tamaginni innaallagiamut, imeqarnermut kiassarnermullu assigiimmik akeqartitsinissaq pillugu ersarissumik anguniagaqarnermik naalackersuisooqatigiinnissamut isumaqatigiisut imaqarpoq.

Ullumikkut nuna tamakkerlugu akit ilusilerneqarnerannut naleqqiullugu allannguutit malunnaateqarluartuusinnaapput. Taamaattumik Naalackersuisut isumaqarput, Nukissiorfiit akigititaasa ilusaannik allannguuteqartitsinissap, politikikkut akit ilusaanni allannguuteqartitsinissamik aalajangiisoqannginnerani, sukumiisumik aningaasaqarnikkut inuiaqatigiinnilu sunniutaasussanik nalilersueqqissaarnissaq, pisariaqartilissagaa. Taamaattumik Naalackersuisut isumaqarput naalackersuisooqatigiinnissamik isumaqatigiisummi siunertaasunik piviusunngortitsinissap ataatsimoorullugu aammalu tamakkiisumik aallaaveqartumik isumaliutersuuteqarneq aallaavigalugu Inatsisartunit suliarineqarnissaa pingaaruteqartoq. Tamanna tunngavigalugu Naalackersuisut inassutigaat siunnersuut itigartinneqassasoq.

Kisiannili eqqumaffigeqqussavara aalajangiiffigisassatut siunnersuut, akit ilusaannut nutaamut siunnersuummik suliaqarluni sulinermi ilassutaasussatut pingaarutilittut Naalakkersuisut ilanngunniarmassuk.

Taamatut oqaaseqarlunga aalajangiiffigisassatut siunnersuutip saqqummiunneqartup Inatsisartuni suliarineqarnissaanut qilanaarpunga.